

中國方志叢書·華中地方·第八七九號

據

清·狄學耕等修，黃昌蕃等纂
清同治十一年刊本

影印

江西省

都昌縣志

(四)

成文出版社有限公司印行

中華民國七十八年三月臺一版

都昌縣志

全四冊

發行人：黃 成 助

台北郵政信箱二二六〇五號

出版者：成文出版社有限公司

台北郵政信箱二二六〇五號

台北市南京東路三段270號9F

電話：七四一五四三二一九

印刷者：上林彩色印刷有限公司

台北市大理街145號

新聞局出版登記證：局版台業字第一一四三號

都昌縣志卷十二

文錄下

清隱禪院記

宋紹聖三年舊遺采省志補

祕書丞

黃庭堅

分甯魯直

發豫章下流畧鄱陽之封據彭蠡上游距南康軍之落星灣輿行一舍舟行百里有大聚落是爲古之鄡陽今爲都昌縣治所山悠而水遠能陰而善晴升南山而望之如李成范寬得意圖畫蓋南山之於都昌如娟秀人直其眉目清明處也其東則謝康樂繙經臺其西則石壁精舍見於康樂之詩石壁之灣洄古木怪石又陶桓公之釣臺也野老巖之下盤折爲隈隩其上泉甘而繁松竹曰清隱寺者唐泰陵皇帝所賜名也其後縣令陳

果用咸通赦書改築于南山之陽自爾餘百年閱廢興多矣守者非其人至無用芘風雨以食熙甯甲寅令王師孟初得廬山僧建隆主之遂爲南山清隱禪院乙卯丙辰而隆卒長老惟湜自廬山來百事權輿願力成就而僧太琦實爲之股肱于今八十年宮殿崇成凡所以安衆作佛事者靡不斬新松竹欣欣安樂雨露而無斧斤引高泉以致日用器械奇巧如人血脉周流于百體也陰房薜壁戶牖通達昔者蟲蛇之寢廟虎豹之燕居無不畚築丹堊糞其寬衍以爲園蔬老者有所休壯者有所游少欲而常足無聚祿而果人之腹余得意于山川以來隨食南北二十年矣未嘗不愛樂此山之美故嘉歎清隱之心賞風月而

同歸清隱曰吾與子同與不同付與五湖雲水惟是艱難以至
燕樂彊爲我記之清隱出福清林氏飽諸方學最後入浮山圓
鑒法遠之室浮山臨濟之七世孫如雷如霆觀父可以知子矣

彭蠡小龍記 宋熙寧年

沈存中

彭蠡小龍顯異至多人人能道之一事最著熙寧中王師南征
有軍仗數十船泛江而南自離真州卽有一小蛇登船船師識
之曰此彭蠡小龍也當是來護軍仗耳典兵者以潔器薦之蛇
伏其中船乘便風日掉數百里無波濤之恐不日至洞庭蛇乃
附一商人船回南康世傳其封域止於洞庭未嘗踰洞庭而南
也軍還以狀聞詔封神爲順濟王遣禮官林子希致詔至祠下

焚香畢空中忽有蛇墜祝肩上祝曰龍君至矣甚重一臂不能勝徐下至几案間執事者共見首如龜不類蛇首也子希致詔意曰臣奉詔來此齋三日然後致祭王受天子命不可以不齋戒蛇受命竟入銀香奩中蟠三日不或動祭之日既灌奠酒蛇自奩中引首吸之俄出徇案行色如溼胭脂爛然有光穿一剪綵花過其尾尚赤其前已變爲黃矣正如雌黃色又過一花復變爲綠如嫩草之色少頃乘紙幡腳以行上屋輕若鴻毛倏忽不見明日子希還蛇在船後送之踰彭蠡乃反此龍遊江湖舟楫間與常蛇無辨但蛇行必蜿蜒而此則直行人每以此辨之

先賢祠記

元天曆二年

吳

澄

臨川人

秦漢而下孔孟之傳不續歷千數百年乃得宋河南程氏兩夫子遠承孟氏之緒而道國元公周子實開端于其先徽國文公朱子又集成于其後二子當熙甯淳熙間俱守南康郡南康偏壘也傳道二大賢嘗過化焉都昌南康屬縣也疇昔仁風之所披拂化雨之所沾濡流芳遺潤百世猶未泯社而稷之尸而祝之也固宜考江丞相修學碑周朱二子有專祠在縣學邇年廢而莫舉詎非掌教非人不以爲意與天厯己巳教諭萬鈞用至惕然大歎白主簿黃將仕孚轉達縣丞何進義縣尹李承務僉議諧協遂營明倫堂之西翼室設二子位扁曰先賢祠允爲知教之本者鄉賢舊亦無祠若朱門四友西坡黃氏梅坡彭氏厚

齋馮氏昌谷曹氏建祠於明倫堂之東翼室彊齋彭氏深居馮氏暨古心江丞相配扁曰鄉賢祠表章尊奉之餘靡不竦慕興起其于人心世教豈小補哉況聖時崇尚義理之學二子皆從事孔廟學者倘不惟二子是師循習卑陋猥同時輩徼近利迷遠志則負公朝愧先師矣師二子宜何如也定而無一物留于心應而無一物乖于理思必通微動必審幾博文以明善約理當作禮以誠身敬主諸中義制諸外其庶幾乎教官率勗邑士精熟朱子所釋諸經諸傳周子所著一圖一書反求之已而真識實踐可也抑自古逮今有教必有政區區于邑校之教幸知所務聞明倫堂北豪民侵疆久不克正職典往往誘于其餌而不

之顧今教官踵前官之所以行具牘于縣簿贊縣尹督府史究
竟根株上其事于郡卒能歸六十年已失之地于黉宮教外之
政此其一爾主簿孚少從予學請爲作先賢祠記而予因及一
縣治官教官之可紀者并書之以勸方來

儀門外大井記

萬松齡

太史公列六家指要以陰陽之術居其首後世堪輿家託焉近
代堪輿宗曾楊不知范氏越舊譌鳳趙所謂傑然者也都昌爲邑

舊治王市鎮遷今治所始于唐山明川媚故老相傳以爲越鳳

過之喜其地勢合兩儀五行八卦十干十二辰之說爲浚舊譌

五井于方隅蓋有深意焉由是疏通縣延淵深名公鉅卿賢士

大夫多此焉出至元丙子冬廬陵范公貳令斯邑首詢民瘼凡可以恤其隱剔其蠹無有知而不爲值歲歉爲勸分以濟困乏雨暘愆期純忱祈禱應捷桴鼓善政攸漸和氣爲之感召瑞麥駢秀又越朞政通民阜優游暇日訪搜古蹟而表章之間五井所由曰噫果吾祖所爲而我後人修濬可緩與矧井濬不食爲我心惻乃捐已俸七百緡得醵五千六百八十用以浚胥地井冽寒泉利用汲引吾享其功民被其澤豈小補哉予嘗讀詩公劉遷邠相其陰陽觀其流泉衛文公徙居升虛望楚景山與京堪輿之術殆權輿乎是不待太史公列六家指要而昉始也易曰冀乎水而上水井井養而不窮也范公于是得勞民勸相

之義並受其福也宜哉

重修儒學記

奎章閣
學士 虞集

皇朝自國都郡縣皆建學學必有廟以祀先聖先師而學所以學其學也有司奉明詔嚴祀典而屬教于校官薄海內外莫不虔敬苟有事焉則必記其事記事者因其地而各有所述以示諷勸此南康路都昌縣之修學所以不可無記也昔者孟子沒而道學失其傳周子起于千載之下而傳之程子而斯道大明以行聖經賢傳之旨論說傳受之備至朱子而茂有加矣而南康之爲郡也蕞爾湖山之間甫及百年周子朱子爲之守其化民之速入人之深豈他郡之所可及哉且都昌之爲邑俗尤淳

厚黃灝彭蠡

省志譌作鳳

馮椅曹彥約

省志作興宗亦誤

四君子者實從朱

子遊講學之懿修行之篤傳諸其家以及其鄉之人者盡宋之季年衣冠相望猶有可考者沐我皇元之治者又七十餘年矣今縣令豫章于友信以爲其曾大父嘗及朱子之門而邑教諭清江宋釗以爲一官五年懼無以自見于學校相與悉力于廟學功成之日使來求文以記之按郡志都昌之學始建于唐咸通中宋因之建炎之後更作者皆有記可考內附以來無大改作禮殿講堂取具而已其門廡諸舍責成衆力是以不能堅久其可書者惟泰定丙寅縣令中山段完澤教諭宋守正爲垣以環宮鑄銅爲祭器燕器與增置水田二十七畝耳及釗與于令

先後至以仍改至元丁丑之歲始謀修學謹簿書之出納粟必至庾錢必至庫民無敢隱吏無敢私根枯地利之沒于民間者而彭氏之子孫喜學校之有興也共割其私田二頃以益學賦將有興作以歲歉未克二年之間祭祀之用師弟子之廩稍旣具會其羨得三百五十餘石爲中統鈔六千餘貫買株杉之木于旁邑以己卯之歲七月經始自禮殿殿門及明倫之堂先賢之祠諸生講肄之舍下至庖庾凡梁棟桷桷一物之旣朽一木之不堪者悉撤而更以良美之材覆宇堅密締構高壯冀可以經久焉外三門撓朽甚不稱觀美易以完植垣墉高厚周密儼然有不可踰之勢焉成以其年十一月爲記其事如此

陶桓公北廟記

失其名

猗與桓公忠義有功德于斯民廟食故鄉而福千載旱乾水溢
宜望走之所先況長吏爲蘇民命而敢忘靈貺乎至正四年甲
申曹南翟侯景初丞都昌時民間生意未全復于天厯己巳大
祲後饑饉薦臻春旱侯切已憂卽叩紫清宮齋宿清事三日謁
威貌于北廟露頂跣行不憚往反五十里隨獲滂沛秧青滿野
六月驕陽侯心彌厲請禱于南北兩祠及梭龍潭臥誓不雨不
歸一誠內竭旣而雨傾晝夜七日十鄉悉徧官民交慶有秋顧
瞻北廟棟宇摧撓于震凌之久心運指畫聿新殿廡儼像設飾
祭器嚴祀事以爲祈報靡不盡善父老相語曰侯之善政不止

是也邑土瀕湖間左之民無葬所死則火燹而水棄之侯心惻然考舊志去縣十里有興孝園荒于榛莽而失其處乃訪得不糧之地于附郭東徧賀家嶺而名偶同思與好義之家買之規爲他日叢塚卽捐俸爲之率先爰復故名興孝及董工役以元疑有字誤豐濟之廩傾軍饌以給海運之舟有便于官無損于下事悉可書斯民沐浴膏澤歌咏勤苦時和歲稔之日而思其所自咸願勒記北廟屬筆于予亦備載之予聳聽父老之言而復之曰侯一念愛民善于先時回造化精明到處何事不立洋洋如在睠此遺黎吾知其延于我侯必使勲業底于有成也人心之至理不磨天下之公論有在此石一立不但勸於來者雖百世

可質諸鬼神

重修陶桓公廟記

本縣熊維豐城訓導人

至誠之道有諸中者必形諸外微于始者必著于終晦于一時者必明于萬世被回曲小人誣謗昧沒于生前者必遇大人君子爲之辨明表白于死後俾其誠精靈應之盛將與日月山岳同其高峻而光明非陰霏沍寒所能揜蔽之而摧頽者矣有若都昌晉陶桓公其殆庶幾乎公名侃字士行少孤終鮮鞠誨于母夫人湛氏公性聰敏勤于吏職恭而近禮愛好人倫其興建義旂康復帝室方當世道橫流頽靡之日乃能正其心術肅其威儀卓然自樹而矯正之非有以存其誠者能之乎而當時史

筆見其功高位尊且誣以夢寐之祥謂其有跋扈之心顧望之跡使其忠義之明如日星者而蔽以雲霧也後數百餘年有大儒朱子者出而爲南康守始繳到都昌居民董翼撫州布衣吳澥江南劉義仲等保贊論辨明其似是之虛得其灼然之實保明疏奏乞贈廟額別立後宮以祀其母湛夫人然後公之忠義橫秋霜而貫白日者始大宣著而光明嗚呼微而顯聞而章所謂不可揜者蓋至此而始驗矣自是厥後至我皇明又數百年廟屢燬而屢興者由其有功德于斯民故也永樂改元後宮屋壞吏茲邑者欲將興焉而弗果越八年平陽王侯毅來判是邑三年德孚民信興廢新舊罔有遺者六月念日侯以官命致祭